

續  
文  
獻  
通  
考

續文獻通考卷之一百二十三

皇明進士雲間王圻纂輯

王禮考 巡狩

宋

寧宗嘉定七年 四月幸太乙宮明慶寺禱雨

理宗景定四年車駕幸太乙宮赴座官賜醴簪花時太學生劉黻上疏諫游幸其畧曰天下有道人主以憂勤而忘逸樂天下無道人主以逸樂而忘憂勤自昔國家人安四夷賓服享國日久侈心漸生若漢武帝之單于震讐而有千門萬戶之觀唐明皇之北邊無事而有驪山溫泉之幸至於隋之煬帝陳之後主危亡日迫遊觀無

度不足效也堯舜禹湯文武之就業祇懼終始憂勤無  
逸言遊畋則不敢日昃則不暇食曷嘗借祈禳之詭以  
事遊觀之適比年以來以幸爲利以玩爲常未免有輕  
視世故眇忽天下之心單于未嘗震讐而有武帝多欲  
之費耗北邊未嘗無事而有明皇宴安之禍毒陛下春  
秋尚壯貽謀垂憲之機悉在陛下作而不法後嗣何觀  
自十數年間創龍翔創集慶創西太乙而又示之以遊  
幸導之以禱祠蠱之以虛誕不經之說孔子曰少成若  
天性習慣如自然積久慣熟牢不可破誰得而止之且  
西太乙之役倭者進曰太乙所臨分野則爲福近歲自  
吳移蜀信如析榱之說西北坤維安堵可也今五六十

州安全者不能十數敗降者相繼福何在耶武帝祠太  
乙於長安至晚年以虛耗受禍而後悔方士之謬雖其  
悔之弗早猶愈於終不知悔者也夫九人主不能無過  
脫有過言過行宰執侍從當言之給舍臺諫當言之縉  
紳士大夫當言之皆所以致君於當道者也今陛下未  
爲不知道未爲不受人言宰執以下希寵而不言言之  
而不力皆非所以愛陛下也

遼太祖匹馬一麾斥地萬里經營四方未嘗寧居太宗兼  
制中國秦皇漢武儀文日至後嗣因之旄頭豹尾驅五  
京之間終歲勤動敬述相尋民勞財匱神冊三年幸  
遼陽故城七年次昭烏山省風俗見高年議論朝政定

吉凶儀

太宗天顯元年正月幸渤海復幸忽汗城閱府庫物賜從臣有差 十年十一月幸弘福寺見觀音畫像乃大聖皇帝應天皇后及人皇王所施顧左右曰昔與父母兄弟同聚觀于此時月未幾今我獨來悲嘆不已 會同三年三月詔扈從擾民者從軍律

穆宗應曆十三年二月如黃河觀群臣射賜物 十六年七月諭有司凡行幸之所必高立幟幟令民勿犯違者以死論

聖宗統和四年四月次南京以夷離畢姑里右部送輜重於行宮暑行日五十里人馬疲乏遣使讓之 七年正

月幸易州御五花樓撫諭士庶 十年正月如臺湖以  
臺湖爲望幸里 十二年三月如長春宮觀牡丹 二  
十一年九月幸女河湯泉改其名曰松林 開泰四年  
十二月南巡海徼 太平三年五月清暑細山賜名曰  
永安 四年正月如鴨子河二月改鴨子河曰混同江  
捷魯河曰長春河 五年幸南京民以年穀豐盈車駕  
臨幸爭以土物獻上禮高年恤鰥寡賜酺飲至夕六階  
燈火如晝士庶嬉遊上喜亦微行觀之

興宗重熙五年四月幸后弟蕭無忌第曲水泛觴賦詩

五月幸北院大王高十行帳拜興賜銀絹 七年二月

駐蹕東川幸五方閣鷹鵠 十五年七月如秋山禁扈

從踐民田 二十三年十月駐蹕中京幸新建秘書監  
道宗大康三年二月以中京饑罷巡幸 五年九月禁扈  
從擾民 大安二年九月還自上京出太祖太宗所御  
鎧仗示燕國王延禧諭以創業征伐之艱

天祚帝保大二年正月爲金人所逼幸雲中遺傳國璽  
遼帝秋冬避寒春夏避暑隨水草就畝漁歲以爲常四時  
各有行在之所謂之捺鉢 春捺鉢曰鴨子河濼 夏  
捺鉢無常所多在兔兒山 秋捺鉢曰伏虎林 冬捺  
鉢曰廣平淀

廣平淀皇帝牙帳以槍爲硬寨用毛繩連繫每槍下黑  
氍毹一以庇衛士風雪槍外小氍毹一層每帳五人各

執兵仗爲禁衛南有省方殿殿北約二里曰壽寧殿皆  
木柱竹椽以氍爲蓋綵繪柱錦爲壁衣如緋繡額又  
以黃布繡龍爲地障窓隔皆以氍爲之付以黃油絹基  
高尺餘兩廂廊廡亦以氍蓋無門戶省方殿北有鹿皮  
帳帳次北有八方公用殿壽寧殿北有長壽帳衛以硬  
寨宮用國兵四千人每日輪番千人祇直禁衛外卓槍  
爲寨夜則拔槍移卓御寢帳周圍拒馬外設舖傳鈴宿  
衛每歲四時周而役始焉 四時巡狩契丹大小內外  
臣僚并應役次人及漢人宣徽院所管百司皆從漢人  
樞密院中書省惟摘宰相一員樞密院副都丞旨二員  
令史十人中書令史一人御史臺大理寺選摘一人扈



從每歲以正月上旬車駕啓行宰相以下同于中京居  
守行遣漢人一切公事其除拜官僚止行堂帖差俟會  
議行在所取旨出給誥勅文官縣令錄事以下更不奏  
聞武官須奏聞不許擅除五月納涼行在所南北臣僚  
會議受宋及諸國禮貢十月坐冬行在所亦如之

問聖體儀 車駕至捺鉢坐御帳臣僚公服問聖躬萬  
福贊再拜各祇候奏事宜徽以下常服教坊與臣僚同  
車駕還京儀 前期一日宣徽以下橫班諸司閣門並  
公服于宿帳祇候至日詰旦皇帝乘玉輅閣門宣諭軍  
民訖道駕侍相以下進至內門閣副勘箭畢通事舍人  
鞠躬奏臣宣放仗禮畢

勘箭儀 皇帝乘玉輅至內門北南臣僚于輅前對班  
立勘箭官執雌箭門中立東上閣門使詣車前請雄箭  
在車左立勾勘箭官進勘箭官揖進至車約五步面車  
立閣使言受箭行勘勘箭官拜跪受箭舉手勘訖鞠躬  
奏內外勘同閣使言准勅行勘勘箭官平立退至門中  
舊位立當省執箭贊軍將門伏官近前門伏官應聲開  
門舉聲兩邊齊出並列左右立勘箭官贊呈箭次贊內  
出喚伏御箭一隻准勅付左金吾杖行勘贊合不合應  
合合合贊同不同應同同訖勘箭官再進依位立鞠  
躬自通全銜臣某對御勘箭同退門中立贊其箭謹付  
閣門使進入事畢其箭授閣使轉付宣徽

金太宗天會八年七月如東京溫湯 十年七月如中京

十月如興中府 十二月至自興中府 十二年正

月如東京 四月至自東京

熙宗天眷元年二月如爻刺泰水幸天開殿 二年二月

如天開殿 六月至自天開殿 三年四月如燕京

皇統二年二月如天開殿 四年二月如東京 九月

如東京 五年正月次濟州東水 九月至自東京

時諫議大夫程杲疏畧曰古者天子皆有巡狩無非事  
者或省察風俗或審理冤獄或問民疾苦以宣布德澤  
皆巡狩之名也國家肇興誠恐郡國新民逐末棄本習  
舊染之污奢侈詐僞或有不明之獄濫之刑或力

無時四民失業今驚輿方將憲古行事臣願天心洞照委之長貳釐正風俗或置匭匣以申冤枉或遣使郡國問民無告皆古巡狩之事昔漢昭帝問疾苦光武求民瘼如此則和氣通天下不平可坐而致也疏奏上嘉納之

海陵貞元元年二月自中京如燕京 三月至自燕京始備法駕 二年三月幸大興府 正隆六年正月命叅知政事李通諭宋使徐度等曰朕昔年從梁王軍樂南京風土常欲巡幸今營繕將畢功期以二月末先往河南帝王巡狩自古有之以淮右多隙地暫欲校獵其間從兵不踰百人况朕宗室陵廟在此安能入于彼乎汝

等歸告汝主令有司宣諭朕意使淮南庶民無懷疑懼  
三月次河南府幸汝州溫湯視行宮地自中都至河  
南所過麥皆爲空復禁扈從毋輒離次及遊賞飲酒犯  
者死而莫有從者 六年四月次溫湯戒扈從毋輒過  
汝水上

世宗太定元年十一月以如中都期日詔群臣入詔中都  
轉運使左淵曰凡宮殿張設無得增置無役一夫以擾  
百姓但謹園禁嚴出入而已戊子辭謁太祖廟及貞懿  
皇后園陵已丑如中都 三年九月如大房山詔翰林  
待制劉仲海等廉問車駕所經州縣 四年正月如安  
州春水大雪詔扈從人舍民家者人支錢一百與其主

九月幸鷹房主者以鷹隼置內省堂上上怒曰此豈  
相廳事豈置鷹隼處耶痛責其人俾置他所 七年十  
月次保州上謂侍臣曰近聞朕所經郡邑增宴寢堂宇  
後皆避之此甚無謂可宣諭令仍舊居住 十二年五  
月如百花川諭宰臣曰朕每次舍几秣馬之具皆假于  
民間多亡失不還其主此彈壓官不職可擇人代之所  
過即令詢問但亡失民間財物並償其直 十七年五  
月幸姚村淀閱七品以下官及宗室子諸司承應人射  
有差 十八年正月如春水 四月上謂宰臣曰朕巡  
狩所至必令體訪官吏臧否何如王田主簿石抹杓乃  
能吏也可授爲本縣令 二十年正月幸石城縣行宮

以玉田縣行宮之地爲御林大淀樂爲長春淀 二十  
二年三月諭戶部今歲行幸山陵所須並不得取諸民  
間雖所用人民並僱以官錢違者杖八十罷職 二十  
四年十月幸東宮賜皇孫吾魯補洗兒錢 時世宗將  
幸上京大理司直路伯達上書諫曰人君以四海爲家  
豈獨藉邦是思空京師而事遠遊非慎重之道也書奏  
不報後薛王府掾梁襄上疏極諫曰金蓮川在重山之  
北地積陰冷五穀不殖郡縣難建蓋自古極邊荒棄之  
壤也氣殊候異中夏降霜一日之間寒暑交至特與上  
京中都不同尤非聖躬將攝之所凡奉養之具無不遠  
勞飛輓越山踰險其費數倍至于頒會之處車騎闐塞

主客不分牛馬。逸以難收。滅獲逋逃。而莫得奪。蹠蹠未易禁止。公卿百官。衛士富者。車帳。淫容。貧者。穴居露處。與堂皂隸。不免困踣。饑不得食。寒不得衣。一夫致疾。染及衆人。大傷無辜。何異刃殺此特細故耳。更有大于此者。臣聞高城浚池。深居遠禁。帝王之藩籬也。壯士健馬。堅甲利兵。帝王之爪牙也。今行宮之所。無有高殿廣宇。城池之固。是廢其藩籬也。掛甲常坐之馬。日暴雨蝕。臣知其必羸瘠矣。御侮待用之軍。穴居野處。冷啖寒眠。臣知其必疲瘁矣。衛軍周廬。纔容數人。一旦霖潦積旬。衣甲弓刀。霑濕凍脆。豈堪爲用。是失其爪牙也。神龍不可以失所。人主不可以輕行。雖陛下悅。以使人勞而



不怨豈若不勞爲愈人君者不可恃人無異謀要在處  
已無憂患之地耳燕都地處雄要北倚山嶮南壓區夏  
若坐堂隍俯視庭宇本地所生人馬勇勁方遼雖小止  
以得燕故能控制南北坐致宋幣燕蓋京都之選首也  
況今又有宮闕井邑之繁麗倉府武庫之充實百官僚  
屬皆處其內非曩日之陪京也居庸古北松亭榆林等  
關東西千里山峻相連近在都畿易于據守陛下舍此  
而他往倘有內隙乘之臣甚懼焉議者謂往年遼國之  
君春水秋山冬夏捺鉢舊人喜談之以爲真得快樂之  
趣陛下效之耳臣謂三代之政今有不可行者况遼之  
過舉哉且遼之基業根本在山北之臨潢其所遊不過

臨潢之旁儀物殊簡輜重不多隔三五歲方一行非歲歲如此也本朝皇業根本在山南之燕豈可舍燕而之山北乎上京之人棟宇是居不便遷徙方今幅員萬里惟奉一君承平日久制度殊異文物增廣輜重浩穰隨駕生聚殆逾百萬如何歲歲而行以一身之樂歲使百萬之人困于役傷于財陛下其忍之歟世宗納之爲罷行

章宗明昌五年八月如胥沙秋山 六年十月以歲幸春水秋山五日一進啓居表自今可十日一進 承安四年六月次定興禁有司扈從蹂踐民田次中府勅令扈從軍所踐禾稼計直酬之 泰和二年五月諭有司曰

金井捺鉢不過二三日留朕之所止一涼厦足矣若加  
修治徒費人力其藩籬不急之處用圍幕可也 又勅  
御史臺京師拜廟及巡幸所過州縣止令洒掃不得以  
黃土覆道違者罪之

元

世祖中統元年車駕駐昔兀之地命給官錢催京橐駝運  
米萬石輸行在所 四年車駕幸開平 至元元年二  
月車駕幸上都 九月車駕至自上都 三年二月車  
駕幸上都 九月車駕至自上都 是年詔上都路總  
管府遇車駕之巡幸行留守司事車駕還即復舊 四  
年二月車駕幸上都 是後九十七幸不悉書 十八

年春正月帝如鄆州二月如郴林三月朔還宮 二十  
五年三月大駕幸上都 丁酉駐蹕野狐嶺 七月駐  
蹕許泥牙之地 九月大駕駐野狐嶺 壬辰至大都  
三十一年成宗既即位巡狩三不刺之地董文用言  
先帝新棄天下陛下巡遊不以時無以慰安元元人君  
猶北辰居其所而衆星拱之不在勤遠畧也宜還京師  
上從之車駕還宮 是年九月聖誕節帝駐蹕三部落  
受百官朝賀 時監察御史崔敬疏言太祖以上都爲  
清暑之地車駕行幸歲以爲常閤有大安殿有鴻禧慶  
思所以保養聖躬適起居之宜存畏敬之心也今失制  
幹耳朵思乃先皇所以備宴遊非常時臨御之所陛下

方以孝治天下屢降德音祇行宗廟親祀之禮雖動植無知罔不歡悅而國家多故天道變更臣備員風紀以言爲職願大駕還大內居深宮嚴宿衛與宰臣謀治道萬機之暇則命經筵進講究古今盛衰之由緝熙聖學乃宗廟之福也

成宗元貞元年二月車駕幸上都二年三月車駕幸上

都 是年又幸五臺 大德三年車駕幸柳林 時每

歲或二月三月車駕幸上都至九月或十月還大都

武宗時每歲幸上都如成宗 至大四年時仁宗未改元車駕將

還大都太后以秋稼方盛勿令鷹坊等人隨往庶免害

稼勅禁止之

仁宗時每歲幸上都如武宗

英宗至治二年三月帝如柳林 五月如五臺山以具金

節爲玄教大宗師 時每歲幸上都如仁宗

泰定帝泰定三年七月幸大乾元寺 時每歲幸上都如

英宗 四年二月壬午狩于溲州

文宗天曆元年幸大聖萬安寺謁世祖裕宗神御殿 至

順元年五月車駕發大都次大口已巳次龍虎臺 六

月大駕至上都 閏七月大駕將還勅上都兵馬司二

員率兵士由偏嶺至明安巡邏以防盜賊 丁酉大駕

發上都 八月大駕至京師 是歲樞密院臣言每歲

大駕幸上都發各衛軍士千五百人扈從又發諸衛護

軍萬五千人以駐山後蒙古軍三千人駐官山以守關  
梁乞如舊數調遣以俟來年從之 二年車駕幸上都  
三年五月大駕發大都時巡松上都

順帝元統二年四月車駕時巡上都 九月車駕還自上  
都 順帝至元之世以二三月時巡上都至六月還大  
都 至正元年至十八年每歲以四月時巡上都八月  
還大都

皇明

太祖洪武元年八月 帝幸北京先是 上得汴梁 詔  
以金陵爲南京汴梁爲北京至是幸之十月戊寅還南  
京 八年四月 上幸中都次滁州遣官祭滁陽王

上駐中都祭告 天地 五年定出巡儀注 車駕出入有司肅清道路官民不許開門觀望行立所在官員父老合迎 駕者於仗外路右叩頭俯伏候 車駕前行方起若遇 駐驛之處合迎 駕之人行五拜禮 車駕行處有衝入仗內者絞仗外五十步內觀望者杖如於郊野外一時不能迴避者俯伏行立觀望者杖典伏衛官故縱者同罪失覺減二等陳訴冤抑仗外俯伏以聽如衝入仗內者如律合迎 車駕之人仗外不俯伏者亦如律 車駕所至九文武官非近侍及宿衛護駕而在五十步內者依例俯伏行立觀望者如律 縱放牲畜突入仗內者杖 九皇城宿衛及在京守門



官員軍士遇 駕出入執仗肅立不湏迴避其在外城  
鎮守門官及士卒如遇 車駕經行則俯伏迴避

成祖永樂六年八月丙戌 詔明年二月巡北京 七年

正月 命學士胡廣諭德楊榮金幼孜修撰王英等扈

從 二月 上啓行 命皇太子監國 三月 車駕

至北京 御奉天殿受朝賀 八年十月丁酉 車駕

發北京 十一月癸亥朔冬至 車駕還京 十一年

二月 上巡幸北京 皇太孫從 十四年冬十月

上還南京 十五年三月壬子 上巡北京 皇太子

監國 命胡廣楊榮金幼孜扈從

六年改定巡幸儀注 一 詔諸司及鎮守官知會

一禮部預行各處凡有重事并四夷來朝俱達行在所仍具本於開其餘事務奏啓俱達京師啓開施行事有疑礙者在京合該衙門具奏取自上裁凡進拜表箋表文達行在所箋文達京師一禮部預行經過所在軍民衙門候車駕至官吏生員耆老朝見及預行北京畿內文武衙門令掌印官候車駕至朝見一祭祀車駕將發奏告天地社稷太廟孝陵祭大江旗纛等神輟祭於承天門其經過處所滁州遣官祭滁陽王泗州遣官祭祖陵鳳陽祭皇陵祭淮關里遣官祭先師孔子望祭泰山沿途古先聖賢忠臣烈士祠墳禮部預期奏聞遣官致祭將至北

京境上設壇祭北京山川等神 車駕至北京奏告

天地祭告境內山川等神 一扈從在京馬步軍五萬

人內馬軍一萬步軍四萬馬軍五千步軍五千充 駕

前軍餘馬軍五千步軍三萬五千分五軍率領每軍馬

軍一千步軍七千以都指揮指揮千百戶管領錦水衛

仍選將軍五百人校尉二千五百人力士二千人 一

侍從五府都督各一員甘領官一員吏六人吏部堂上

官一員文選等四司官五員辦事官二十員歷事監生

四十人人材五十人吏十人戶部堂上官一員北京等

十二司官十三員辦事官十員吏二十四人禮部堂上

官二員儀制等四司官七員辦事官十員吏十二人鑄

印局官一員吏一人匠六人兵部堂上官一員武選等  
四司官七員辦事官五員吏十五人刑部堂上官一員  
浙江等十二司官十二員辦事官五員吏十三人工部  
堂上官二員營繕等四司官十員辦事官二十員吏十  
五人都察院堂上官一員浙江等十二道監察御史二  
十四員辦事官五員吏二十四人通政司堂上官二員  
首領官一員吏六人大理寺堂上官一員左右寺官六  
員吏十人太常寺堂上官二員首領官一員吏二人贊  
禮郎四員協律郎一員司樂一員樂舞生二十人厨子  
五十人光祿寺堂上官三員首領官一員署官十七員  
辦事官六員吏三人厨子一千人鴻臚寺堂上官四員

首領官一員序班四十員鳴贊四員及通曉夷語者斟酌帶去翰林院內閣官三員侍講修撰典籍等官六員書制勅秀才八人及譯寫四夷文字監生十三人尚寶司官二員吏科給事中三員戶科給事中三員禮科給事中三員中書舍人四員寫誥秀才五人行人司行人十員太醫院堂上官二員生藥庫官一員醫士摘選十分之二吏三人欽天監官三員天文生十五人教坊司奉鑾韶舞司樂各一員俳長色長樂工尉酌用之一扈從文武官軍人等陸路文武官員人等寫制誥秀才譯字監生緊用供應醫士天文生及各廚役人等俱給馬騾驢匹官給外脚力鹽給鈔六十錠

辦事官監生人才吏典及醫士厨役等非累用者人給  
脚力鈔二十錠隨伍官員將軍校尉力士旗軍每二人  
給驢一匹如不敷亦給鈔六十錠自備水路俱應付船  
隻遇陸路應付車輛一緣途各站每站增馬二十疋  
令附近衛所馬軍內差撥仍令附近有司備車一百輛  
無車之處起夫五百人聽候一經過處所支給糧草  
扈從官員人等日給行糧二升馬日給料四升草一  
束驢料一升草一束一車駕將發宴在京文武群  
臣賜扈從文武官員軍校人等鈔公五十錠候四十  
錠伯三十錠一品二品二十錠三品四品十五錠五品  
十二錠六品七品十錠八品九品八錠未入流及辦事

官將軍總小旗人鈔七錠將軍及各衛總小旗人鈔六錠監生秀才吏典人材醫士樂舞生軍校力士厨子工匠人鈔五錠軍伴皂隸樂工人等人鈔四錠在外衛所扈從及各處駐劄官軍依京衛官軍例給賞 一 車駕至北京宴文武群臣耆老 賜官員人等及命婦鈔其嘗守城命婦論次行賞 一 恭遇 萬壽聖節公侯駙馬伯文武官四品以上近侍官及監察御史預宴五品以下并辦事官監生秀才吏典軍民工匠人等依例賜鈔一錠 一 五軍六部都察院大理寺錦衣衛各鑄印信通政司鴻臚寺各鑄關防 一 扈從官員有牙牌者隨身懸帶以憑關防出入 一 經過郡縣分遣廷

臣考覈守令賢否即加黜陟分令給事中監察御史存問高年 賜幣帛酒肉 一經過鳳陽 陵戶及親戚人 賜鈔六錠耆老迎見者人鈔三錠泗州 陵戶親戚耆老迎見者賞如之

宣宗宣德五年九月 車駕巡近郊冬十月丙子 車駕發京師駐蹕玉河 諭成國公朱勇等曰今農收雖畢而禾稼在場民間公私之費皆出於此扈從官軍不許入民家有所求索違者處以重刑其申 令各營悉知之 壬午駐蹕雷家站 召學士楊士奇楊榮金幼孜楊溥問曰唐太宗過此非征遼時乎衆對曰然 上曰太宗恃其英武而勤遠畧此行所喪不少帝王之鑒戒



也又問此山崩於順帝時人率謂元亡之徵卿等以爲如何衆對曰順帝自是亡國之主雖山不崩國亦亡

上曰此言正合朕意昔聖帝明王之世未嘗無災異大抵國之存亡係其君德之仁與不仁而已戊子回鑾

駐泥河壬辰車駕至京師九年九月上將率師

巡邊命寒義楊士奇楊榮胡熒楊溥吳中等扈從癸未車駕發京師丁酉駐蹕洗馬嶺庚子回鑾

武宗正德九年二月帝始徵行十二年八月上出

居庸關至懷來宣府等處游獵邊將江彬輩導之也先

是彬與邊將許泰劉暉等皆有寵于上賜姓朱氏號

外四家與上在豹房同卧起仰近而彬寵尤盛晏望

上出宮游戲近郊至居庸關巡關御史張欽閉關上  
疏不聽遂遠出關外楊廷和等累疏請回鑾且言居  
庸臨邊北虜不時出沒爲寇正統末年之時未遠可爲  
明鑒不聽九月上幸大同獵陽和虜以衆數萬掠  
應州上命諸將擊之虜引去一三年春三月  
郊祀畢上復出關游二月二日太皇太后王氏  
崩上還京四月朔上以太后将祔葬詣天壽山  
祭告遂往黃花鎮密雲等處游獵五月末旬上還京  
六月虜入寧夏塞上復議北巡楊廷和等諫萬  
乘不宜輕出上不聽乃自稱威武大將軍太師鎮國  
公朱壽巡邊又欲以朱彬爲威武副將軍扈從以行

命內閣草 勅廷和語毛紀具疏連名上之疏畧曰人  
君承天命以爲天子四方萬國皆其臣妾今乃假稱威  
武大將軍國公名號下同臣庶天地易位冠履混淆自  
古及今未之有也適者 皇上時出巡游天下人心無  
不疑懼柰何又復爲此萬一 宗藩之中或有援引  
祖訓指此爲言不知 陛下何以應之又或以 朝無  
正臣內有奸邪爲名不知 陛下之左右及臣等代言  
之臣又將何以自解臣等戮身亡家固不足惜但恐  
朝廷之上禍亂或從此始耳此臣等之所以日夜痛心  
疾首而不敢以自默也疏上不省時 上必欲內閣草  
勅屢遣中官促之楊廷和稱疾不出 上御左順門

召梁儲面促草 勅儲奏曰 勅不敢草 上曰何  
乃逆 命對曰九事可將順獨此 勅不敢草 上曰  
何不敢對曰 陛下爲君乃自卑而列於臣臣草 勅  
是以臣名君故不敢 上大怒手劍立曰不草 勅齒  
此劍儲免冠解帶伏地流涕曰臣逆 命有罪願就死  
若草 勅則以臣名君臣死不敢奉 命良久 上亦  
察其誠擲劍而起更 命廷和草之旣而禮部尚書李  
遜學等廷議欲建 儲居守時朱寧陰受寧主宸濠賂  
謀入寧世子司香 太廟江彬亦欲立所厚遠藩各陰  
有所主梁儲厲聲曰 皇上春秋鼎盛建儲未宜輕言  
萬一有他吾輩伏斧鑕矣邪謀豈可聽徇王瓊王鴻儒

亦助言之謀遂寢 八月 上北巡出居庸關遂歷宣  
府至大同 九月 上在大同 冬十月 上自偏頭  
關渡河幸榆林 十一月 上在榆林 十二月 上  
在榆林 十四年春正月 上在榆林 二月初旬  
上自榆林還京師 三月 上欲巡視秦岱歷徐揚抵  
南京下蘇浙浮江漢登武當且過觀中土繁麗諸處都  
下人情怵怵靖江西寧藩又蓄異謀俟釁而發內外咸  
以爲憂於是翰林修撰舒芬等約諸同志上疏乞留俱  
會 闕下吏部尚書陸完迎諸上疏者曰 主上聞直  
諫輒引刀爲劊狀今且撥賴矣其容色雖氣盡歸咎於  
上以沮言者一時言官又多其黨遂爲所沮芬乃邀

吏部郎中夏良勝儀制郎中萬潮太常博士陳九川各  
疏連上太醫院醫士徐鏊以醫諫又明日吏部郎中張  
行慶禮部郎中姜龍兵部郎中黃鞏孫鳳員外陸震刑  
部郎中顧棠率部僚合疏入又明日工部郎中林大輅  
等大理寺正周叙等行人司副余廷瓚等並連名疏入  
於是 上大怒下黃鞏陸震夏良勝萬潮陳九川徐鏊  
于錦衣衛獄 命舒芬張衍慶姜龍孫鳳陸倬等百有  
七人跪于 午門外五日林大輅周叙余廷瓚等二十  
餘人俱下獄明日同黃鞏等六人亦跪五日於是數日  
京師陰霾晝晦人情震駭宮城內海子水溢四五尺折  
橋下鐵柱有金吾衛指揮張英明言 車駕出必不利

乃肉袒露乃于胸以死諫於是 旨命錦衣衛將舒芬等百有七人俱 午門前各杖三十爲首者調外任芬調福建市舶副提舉餘俱罰俸半年 夏四月 命錦衣衛將黃鞏等六人 午門前杖五十徐鑒發克軍鞏震長勝潮九川俱爲民林大輅周叙余廷瓚杖五十降三級調外任其餘俱杖四十降二級調外任時被杖而死者陸震余廷瓚主事劉校何遵評事林公黼照磨劉珏行人孟陽李紹賢劉平甫李翰臣詹軾十有一人車駕遂不果出雖士氣少振江彬姦謀少沮而 國體亦少損矣 八月下 詔南征大學士梁儲蔣冕扈從時王守仁捨宸濠捷音猶未至京諸邊將在豹房者

各逞所見獻擒宸濠之策 上亦欲假親征南游太監  
張忠等見錢寧戚賢事敗又欲因此邀功 上出師駐  
蹕良鄉都御史王守仁擒宸濠捷音至入奏 上令遣  
回待至南京另奏大學士梁儲蔣冕以宸濠就擒江西  
已寧屢請回 鑒不聽 九月 上至南京 十月  
上在南京 禁約人民不許養猪及易買宰殺違者發  
極邊衛充軍以猪音同國姓也遠近流傳旬日之間  
各處城市鄉村居民將所養猪盡行減價賤賣 十一  
月 上在南京 十二月 上在南京 十五年正月  
上在南京欲就南京舊壇大祀 天地梁儲等言南  
北配位不同且典章不可紊乃止 二月 上在南京



楊廷和毛紀疏請回鑾謂大祀之禮行於正月  
杜稷之祀舉在仲春孝貞皇后大祥在二月二日禮  
應即時祔廟今改卜至再甚爲非宜天下朝覲官員  
吏部考察上請未奉定奪各官離任旣久政務悉廢  
殿試進士之制亦已踰期自去秋聖駕南行至今八  
月有餘在京在外各衙門題奏俱未蒙發出施行伏望  
亟賜頒師還京舉行前頒大禮各衙門題奏文書  
早賜發出毋致事務久稽有生他虞不報夏四  
月上在南京五月上在南京六月上在南京  
京秋七月上駐驛南京旣久復有游蘇杭泛江浙  
汴湖湘登武當之意畿內郡縣供給繁雜梁儲將見自

執書奏懇請 回鑒泣跪於行宮門外自未至酉 上遣中官取奏入且 諭之起對曰臣未奉 旨不敢起中官復出傳 旨云已知道日下便要 回鑒儲等乃起 八月 上在南京 九月 上在南京群黨欲自獻俘襲功張永曰昔未出京宸濠已擒柰何襲之於是以大將軍鈞帖令王守仁重上捷音守仁乃節畧前奏入諸人名于疏內上之 上始議北旋 十月 上自南京班師凱旋 十二月駐蹕通州 十六年春正月 上還京

世宗嘉靖十五年三月 上欲擇壽域奉 皇太后謁萬壽山陵遂行十八道嶺李時夏言顧鼎臣廖道南郭

勛扈從 壬戌祀 文皇帝于平臺山言行帳火暨勛  
時帳俱燼言所收奏章五通亦燼翌日泛舟西湖 上  
製泛舟賦 命和時勛以災䟽謝言不謝 上切責之  
輸罪乃已 夏四月作 幽宮 上復幸西山視工  
八月 上復如天壽山遷 孝肅太皇太后神主於  
裕陵 孝穆皇太后 孝惠太皇太后神主于 茂陵  
各享殿夏言李時扈從還告 祖考于 內殿 十七  
年夏四月庚戌 上如平臺山以 文皇駐蹕之所  
命建亭崇祀 十八年二月十六日 駕出京南詣湖  
廣承天府視計 顯陵先是 獻皇后崩 上與群臣  
詳議合葬 顯陵會錦衣衛趙俊自承天回言 玄宮

有水又有言 顯陵土壤故 震位久虛者而尚書汪

鉉亦言當遷入 天壽山 上乃決意南巡躬閱 冊

立 皇太子監國以宣城伯衛綽等爲留守使起翟鑾  
爲行邊使顧鼎臣同留守張瓚泰預機務太監麥永協  
守及分守京城官十人 賜鼎臣 勅曰朕幸承天已

冊東宮監國特留卿贊輔協董文武重臣居守內自  
掖廷外而都城遠及邊鄙百司庶務悉以付卿事須入  
告者以 賜印密啓 乙卯 駕發 丁卯次衛輝

行宮火陸炳負 帝出畿中 四月庚辰 回鑾 詔

天下曰朕以菲才叨承 天眷君茲黔首主御華夷所  
事者人極重焉故首正父子天倫之正復崇 考廟當

有所宗邇者積愆殊深累于慈聖鸞輿遐邁哀徒摧  
五內之傷鳳寢丹圉禮厥宣二親之共匪自經營何  
慰夙夜乃於今年春仲之十有一日奏告於天地  
宗廟社稷徧達於百靈衆秩於十有六日駕徂荆  
楚之舊藩躬視承天之嚴寢月二十有五日駐蹕龍  
飛內之卿雲宮齋潔肅誠定禮備樂有五日元吉祇  
奏告大祀于皇天奉皇考睿宗獻皇帝上配報生  
恩而謁顯陵答神功而祭社稷以及道經之望徧兼  
舉諸王群職迎覬獻誠雖未如四狩之巡亦以見省方  
之意且朕何人敢外堯舜祗欲伸送終之道以求末世  
之安庶幾教天下也今玄寢之制置旣詳親

尊安攸定但念本根所在百姓繫懷勞擾久時民衆當  
軫承天府免明年田租五分之一北直河南二處亦與  
免明年三分之一用見朕懷恤之意期以今三月二十  
三日還京嗚呼慎終思永立愛敬以式臣民終始永藏  
建中業以遺孫子尚賴忠賢匡于至治 詔爾華夏宜  
悉知之

南巡儀注

一先期 上親奉告皇天于 玄極寶殿同日告聞  
皇祖太廟 皇考睿宗廟遣官分告 北郊 成祖  
列聖群廟 大社稷 帝社稷朝日夕月 天神 地  
祇用祭服太常寺備脯醢酒果翰林院撰告文 一轅

祭於起承天門遣官祭旗纛之神用牲醴制帛三獻如  
常儀 一 駕發出 正陽中門 后妃輦轎後隨錦  
水衛設 欽製武陳駕備輦輿儀仗等項扈行本衛選  
精壯旗校八千人內以六千人專管擡奉 上座輿輦  
二千人專管擺執駕儀及一應正直巡綽傳宣等用選  
委千百戶一百二十員分投管理各分撥班接替行太  
僕寺調取寄養馬三千匹兌給各旗校更迭騎坐以錦  
水衛指揮克前驅使領千百戶等官先往肅清道路  
簡命武職重臣二員留守京城兵部尚書一員叅贊機  
務各請 勅行事以文職大臣一員總督整飭宣大等  
處軍務一員提督薊州山海關等處地方邊備文職重

臣一員充行邊使往遼東薊宣大鴈門固原等九邊閱  
視邊徭戶部齎銀隨去勞賞官軍各請 勅行事兵部  
奏請 皇城四門京城九門 大明門外兩邊守門文  
武大臣各一員坐邊官侯伯二員增設守門官軍用科  
道官點閤京城內外巡捕官軍行圍營再選有馬官軍  
三千員名分爲兩班酌派五城地方與同舊有官軍巡  
邊仍選委坐營官及各提督把總等官晝夜巡捕安定  
德勝門各土城門外及鄭村壩大黃莊居庸關白羊口  
六處地方該營揀選有馬官軍每處一千員名分爲兩  
班輪流下營防守安定德勝門土城各用東西官廳正  
總兵官一員其餘各用叅將一員統領下營紫荆倒馬



二關保定撫鎮官揀選精銳有馬官軍每關一千員名  
分爲兩班每月輪流下營守把各委坐營官一員統領  
一兵部於團營東西官廳御馬監勇士內揀扈駕官  
軍六千員名給兌馬匹內執武陳駕儀一千人總兵官  
一員領之 駕前後各二千人叅將二員領之 駕左  
右各五百人翼 駕行左右副叅將領之及行文沿途  
撫鎮等官調撥兵馬屯駐扈 駕先期戶部請 勅命  
侍郎一員率屬官六員帶領太倉銀三十餘萬兩前去  
沿途整理官軍糧料工部請 勅差郎中一員同內官  
監督理沿途橋道及 行宮席殿禮部行南北直隸浙  
江等十三布政司凡有要緊重事俱達 行在所奏聞

其餘事務俱達在京通政使司照常封進各該衙門啓  
請 皇太子令旨行其事有疑礙者各差人赴 行在  
所奏取 旨各處拜進表箋除歲例等項赴在京禮部  
照常類收啓請司禮監官捧進其特賀大禮不係常典  
者原差人恭詣 行在投進 一扈從官五府堂上官  
各一員首領官各一員吏各一人吏部堂上官一員文  
選等四司官各一員辦事官六員吏六人戶部堂上官  
二員浙江等十三司官各一員辦事官二員吏十三人  
禮部堂上官二員儀制等四司官共六員鑄印局官一  
員辦事官六員儒士三人吏十二人鑄印匠四人兵部  
堂上官一員武選等四司官共六員辦事官一員吏六

人刑部堂上官一員浙江等十三司官各一員辦事官  
一員吏十三人工部堂上官二員營繕等四司官共十  
員辦事官二員吏十人都察院堂上官二員浙江等十  
三道監察御史各二員辦事官四員吏十三人通政司  
堂上官二員首領官一員辦事官二員吏二人大理寺  
堂上官一員左右寺官二員辦事官二員吏二人太常  
寺堂上官六員首領官二員屬官十員吏一人執事人  
役四十人廚役三十人光祿寺堂上官二員四署官四  
員吏四人廚役二百人太僕寺堂上官一員首領官一  
員吏一人鴻臚寺堂上官俱從司儀司賓各一員鳴贊  
四員序班十六員通事四員翰林院堂上并講讀等官

四員 制勅 誥勅二房官共二十員譯字官生四人  
吏十人尚寶司官四員吏一人六科給事中十二員吏  
六人中書舍人一員吏一人行人司行人十員吏三人  
太醫院堂上官五員御醫吏目八員 聖濟殿醫士選  
帶三分之一吏二人欽天監堂上官一員博士等官八  
員天文生陰陽人共十人吏一人教坊司奉鑾韶舞司  
樂八員俳優色長樂工二百人扈從文武內外官及各項  
人役合用夫馬騾驢車輛廩給口糧各項應付事宜兵  
部定擬奏請轉行在外有司一體應付 內府印綬監  
收貯先年 行在衙門印信關防禮部領出給付各扈  
從官使用尚寶司給領文武字樣牙牌 一 駕發留

守大臣率在京文武衙門官員各俱吉服先期赴宣  
武門外彰義關候送 駕過退扈從官分程先發在途  
俱免朝參候 駕惟禮兵二部鴻臚寺太常寺科道糾  
儀官從行光祿寺隨路預辦 御膳酒飯供具凡遇  
行宮進膳處所各該撫按守巡兵備等官選委精壯官  
軍披帶盔甲器械拱衛 乘輿不許諠譁錯亂違者聽  
錦衣衛即時具奏拏問其扈 駕官軍戶部給散行糧  
工部辦鍋竈不許分外索害有司及入民舍混擾違者  
許被害等人赴撫按衙門告治仍行隨 駕緝事官校  
訪拏重治各該軍衛有司不許分外科歛違者聽撫按  
官體訪指實奏寃重治各衙門跟隨吏書人等各照兵

部原行關文於軍衛有司驛遞衙門應付不許分外多  
索其應付衙門亦要即時應付毋得遲悞違者俱赴所  
在官司告治經過駐劄地方原有商賈店舖開賣飯食  
等物照常市買不許躲避亦不許從駕人員用強輕  
價勒買違者許被害之人即時告治兵部咨行各該巡  
撫官預先出給榜文曉諭一經到處所真定望祭北  
嶽恒山之神用牛犢羊豕上其常服行禮如常儀五  
府九卿巡撫大臣吉服陪拜衛輝遣官祭濟瀆之神用  
太牢鈞州望祭中嶽嵩山之神榮澤祭河神俱用太牢  
行禮如北嶽南陽遣官祭武當山之神用牲犢沿途古  
帝王聖賢忠臣烈士祠墓禮部查訪預期奏聞遣官致

祭帝王用太牢次用少牢又次脯醢酒果凡祭翰林院  
撰祭文 一各處撫按并三司官俱於所屬境上候  
駕先赴行在鴻臚寺報名 駕至行宮各俱吉服朝見  
所過府衛州縣官吏生員耆老人等俱于三十里外候  
迎道傍跪叩頭 駕過退 駕至行宮鴻臚寺引見  
俱行五拜三叩頭禮 一各處近路王府許親王  
兵常服預先出城候 駕其餘宗室俱不許擅離府  
出迎 一親王迎接先期 命文武大臣侍於途  
王於道傍拱立文武大臣下馬侍 上左右禮部尚書  
跪奉某王某恭迎 聖駕見內侍官引王至 駕前  
跪行叩頭禮禮部尚書進立于上前候 旨承 旨

訖起立傳 旨示 王隨至 行宮 上入少憩 王

具冕服 欽定文武大臣於殿內左右侍從從官於丹

墀東西侍班候 上陞座鴻臚寺官引 王由殿左門

入至拜位贊行五拜三叩頭禮畢 上命 賜宴內侍

官引 王於別次少候從官叩頭如常儀 王宴畢遣

大臣伴送回府 駕還先以書止諸王勿煩出送 一

上臨舊邸恭詣 皇考睿宗獻皇帝廟謁告儀具祠祭司

越四日行祭告 皇天禮於 龍飛殿丹陛奉 皇考

睿宗獻皇帝配是日 上更衣并服詣 國社壇及山

川壇行告祭禮次日恭謁 顯陵儀具祠祭司次日從 駕

官上表賀遂頒 詔前期一日鴻臚寺陳設表案詔案



於龍飛殿中錦衣衛設隨駕朝儀及迎詔綵輿  
香亭於丹墀教坊司設中和韶樂百官各具朝服地方  
官吏師生耆老人等俱隨班行禮是日早鳴鍾鼓上  
具冕服御後殿執事官行禮畢上陞殿鳴鞭欽天監  
官唱時鴻臚寺贊入班贊四拜興平身唱宣表宣表官  
宣訖贊俯伏興四拜興贊頒詔翰林院官捧詔授  
禮書禮書捧詔置雲盤內叩頭興由殿中門出置綵  
輿內錦衣衛官校舉輿教坊鼓樂前導百官趨出候於  
龍飛門外鴻臚寺贊入班行四拜禮贊跪宣詔畢  
贊俯伏興搢笏贊舞蹈山呼出笏贊四拜興平身禮畢  
禮部尚書捧詔出騰黃奏差行人等官頒示天下

一 聖駕回京 上親奏謝 皇天上帝於玄極寶殿  
同日告謝 皇祖太廟 皇考睿宗廟如常儀文武官  
吏該陪祀者俱具祭服陪拜遣官分告 北郊 成祖  
列聖群廟 大社稷 帝社稷 朝日 夕月 天  
神 地祇太歲旗纛都城隍等神 承天門之神俱行  
禮如初 一百官上表稱賀如常儀

### 東宮監國事例

一 東宮朝駕儀仗等件 勅內府各該衙門先行造  
辦 一請 勅欽命輔臣一員居守京師保護 皇儲  
一應軍國機務悉聽啟行 一在京文武衙門遇有內  
外軍機各 王府緊要重大事務悉奏請處分其有各

處啓報聲息即調遣軍勦捕仍遣人馳赴 行在所奏  
聞 一 皇城四門京城九門比常皆增撥官軍守護  
留守武職大臣同叅贊尚書仍每日操閱軍馬各衛衙  
門稱奉 令旨調遣官軍及處分事務所司須履啟施  
行 一五府九卿各衙門凡有緊要重事俱達 行在  
所奏聞其每月進繳精微監生考勤宴賞鈔錠官軍俸  
糧及五府比試等項俱照常啟行 一祭祀凡遇 忌  
辰 陵祭各常典祭至期太常寺啓請取 令旨遣官  
行禮 郊 廟 社稷之祭候 勅命行 一各處拜  
進表箋持賀大禮不係常典者原差人恭詣 行在所  
投進其進賀 中官 東宮箋文俱在京禮部類收司

禮監官捧進 一各 王府進 慈孝獻皇后香并南京進香官朝鮮國吊使禮部啓請 命司禮監官捧進九筵照例給賞綵段鈔錠 一吏部會推在京堂上官六科都給事中在外方面官知府俱行在吏部奏請擢用其大選急選并取選遠方監生及考滿復職等項俱循例啓行 一各 王府請給 誥命勲臣襲爵歿後追封兩京堂上官贈謚公侯伯内外文職官員請給誥勅兩京三品以上官廕子各處土官襲職俱 行在吏部奏行其官吏人等丁憂查放起復官員附選查題散官等項俱照常啓行 一兵部推補兩京五府錦衣衛在外總兵叅將各都司掌印僉書俱奏請其大選軍

職查黃績黃官舍襲替優給土官襲替及保用通事把  
事隨司辦事長官等項俱啓裁度 一各處奏報邊功  
覈勘明白應該陞賞等項俱啓請行 一在外撫按官  
劾奏不職文武官文官方面以上武官叅將以上奏聞  
待報 一京衛軍士冬夏布絹及邊衛軍士各衣布花  
襖但係年例給賞等項錢糧該衙門啓請行 一在京  
各邊鎮遇有緊急調用馬匹啓請調取兌用 一在京  
各衙門赴 行在奏事人俱兵部啓請給關應付 一  
各 王府奏訴重情辯復爵位祿米者俱詣 行在所  
奏聞其請名請封請婚等項在京俱啓行 一天下歲  
貢生員到部者該部查照事例啓行 一四夷朝貢人

員到京一應賞宴該部照例啓行 一法司問擬罪  
除重囚例該覆題及京官軍職犯人例該叅提俱奏請  
定奪 一刑名凡內外大小官員有犯具啓准問者問  
之若所犯情重該衙門具由奏請待報 一都察院點  
差各處巡按御史具奏 行在餘差及考察公差回道  
御史俱啓行中間有推姦避事賊濫不職者具奏 一  
通政司每日收過奏題本照常封進下科發抄各衙門  
啓行其有疑礙難行者差人赴 行在取 旨 一大  
理寺審錄罪囚詳擬罪名干係生殺并提問大小京官  
具奏其每月繳刑部都察院問過囚犯奏本照常啓行  
俱送科備照

十八年三月辛巳 駕幸純德山立表于陵寢之北  
戊子 閱顯陵調行在禮官曰此中聖靈安悅  
慶流子孫新擇諸所悉已之 行宮勿復治 四月甲  
子 上幸大峪山召嚴嵩諭曰大峪地勢空淒豈如純  
德山完美謹奉 慈宮南柑 二十三年嚴嵩言 陵  
工告完歲清明日請詣陵行春享禮從之

穆宗隆慶元年七月傳諭 聖駕幸藩邸科臣言 皇上  
厚德不忘舊跡固臣下所宜將順但期祥未邁遂肆燕  
遊似非所宜不聽 二年三月傳諭二十六日往觀上  
林苑海子扈蹕止用京營軍無煩冗費閣臣言官合辭  
勸止不允 是月丙子 上幸南苑先是左右有言南

海子之勝者故欣然欲觀是日駕至則荒莽沮濕宮  
館不治上亦悔之遽命還蹕

續文獻通考卷之一百二十三終

續文獻通考卷之一百二十三